

ACORDO DE COLABORACIÓN ENTRE A CONSELLERÍA DO MAR E A AXENCIA PARA A MODERNIZACIÓN TECNOLÓXICA DE GALICIA PARA A EVOLUCIÓN E O SOPORTE DOS SISTEMAS DE INFORMACIÓN VENCELLADOS Á XESTIÓN DAS CONFRARÍAS DE PESCADORES DE GALICIA E AO APOIO NOS PROCESOS ELECTORAIS

En Santiago de Compostela, a 20 de marzo de 2026

REUNIDOS

Dunha parte, Marta Villaverde Acuña, conselleira do Mar, nomeada polo Decreto 35/2025, do 4 de xuño (DOG número 106, do 5 de xuño) actuando en nome e representación da Consellería do Mar da Xunta de Galicia, en virtude das facultades recoñecidas polo artigo 34 da Lei 1/1983, do 22 de febreiro, de normas reguladoras da Xunta e a súa presidencia.

Doutra parte, Damián Rey Rodríguez, director da Axencia para a Modernización Tecnolóxica de Galicia (co NIF Q1500382E), actuando en nome e representación da dita Axencia, en virtude das facultades conferidas polo Decreto 252/2011, do 15 de decembro, polo que se crea a Axencia para a Modernización Tecnolóxica de Galicia e se aproban os seus estatutos, modificado polo Decreto 9/2021, do 21 de xaneiro, polo que se suprime o Centro Informático para a Xestión Tributaria, Económico-Financeira e Contable (Cixtec) e se modifica o Decreto 252/2011, do 15 de decembro, polo que se crea a Axencia para a Modernización Tecnolóxica de Galicia e se aproban os seus estatutos, e polo Decreto 117/2025, do 29 de decembro, polo que se nomea director da Axencia para a Modernización Tecnolóxica de Galicia.

As partes recoñécense capacidade e representación suficientes para formalizar o presente acordo de colaboración e, na súa virtude

EXPOÑEN

Primeiro. A Comunidade Autónoma de Galicia, ao abeiro do artigo 27.29 do seu Estatuto de autonomía (Lei orgánica 1/1981, do 6 de abril), ten a competencia exclusiva en materia de confrarías de pescadores. As súas funcións e servizos foron transferidos polo Real decreto 3318/1982, do 24 de xullo, debendo axustar a súa organización e competencias aos principios e regras básicas establecidas na lexislación do Estado para estas entidades de conformidade co disposto no artigo 15.2 da Lei 12/1983, do 14 de outubro, do proceso autonómico. A regulación estatal das confrarías de pescadores atópase recollida na Lei 3/2001, do 26 de marzo, de pesca marítima do Estado, ás cales lle dedica os artigos 45 a 51. O Decreto 8/2014,

do 16 de xaneiro, regula as confrarías de pescadores de Galicia e as súas federacións.

En Galicia existen na actualidade 63 confrarías de pescadores que son corporacións de dereito público e órganos de consulta e colaboración da Administración en materia de xestión e ordenación pesqueira. Desde xaneiro de 2014 dispoñen do marco xurídico xa mencionado, que lles permite adaptarse aos cambios constantes que se producen no sector, sobre todo no que ten que ver coa xestión dos recursos, co seu ámbito de organización e co funcionamento interno.

Estas normas permiten ás confrarías de pescadores de Galicia traballar como entidades modernas, solventes e competitivas nun mercado da pesca en constante transformación, sempre baixo a primacía da legalidade, transparencia contable e democracia interna.

Polo que atinxe á normativa que regula o proceso electoral nas confrarías de pescadores de Galicia e establece o proceso a seguir en cada momento, detallando todos os pasos para elixir ao patrón maior, vogais do cabido e da xunta xeral, pode ser consultada no seguinte enderezo web: <https://mar.xunta.gal/gl/o-sector/confrarias-de-pescadores/proceso-electoral-de-confrarias-de-pescadores>.

Segundo. Que o Decreto 42/2024, de 14 de abril, polo que se establece a estrutura orgánica da Xunta de Galicia, crea a Consellería do Mar, sendo a Dirección Xeral de Desenvolvemento Pesqueiro un dos seus órganos de dirección de conformidade co establecido no Decreto 49/2024, de 22 de abril, polo que se fixa a estrutura orgánica das consellerías da Xunta de Galicia.

A Subdirección Xeral de Xestión, Ensino e Relacións Sectoriais da Dirección Xeral de Desenvolvemento Pesqueiro ten atribuídas entre as súas funcións as actividades de fomento da programación e coordinación do ensino náutico-pesqueiro nos centros dependentes da consellería, a coordinación da formación, o **asesoramento ás organizacións sectoriais** e a programación e xestión administrativa, económica e orzamentaria da dirección xeral.

Mais en detalle, ao Servizo de Apoio e Relación coas Organizacións Sectoriais correspóndelle a asistencia técnica ás confrarías de pescadores e agrupacións sectoriais, recibir información das actividades das confrarías de pescadores, así como servir de canle ás relacións entre os distintos órganos do departamento e as confrarías de pescadores. Para o apoio no desenvolvemento destas funcións, existen varios sistemas de información realizados para esta unidade pola Axencia para a Modernización Tecnolóxica de Galicia.

Terceiro. O artigo 9 do Estatuto da Axencia para a Modernización Tecnolóxica de Galicia, aprobado polo Decreto 252/2011, do 15 de setembro, e do posterior Decreto 9/2021, do 21 de xaneiro polo que se suprime o Centro Informático para a Xestión Tributaria, Económico-Financeira e Contable (CIXTEC) e se modifica o Decreto 252/2011, do 15 de decembro polo que se crea a Axencia para a

Modernización Tecnolóxica de Galicia e se aproban os seus estatutos, recolle que a AMTEGA ten entre as súas competencias a dirección e xestión de todas as actuacións da Xunta en materia de tecnoloxías da información e as comunicacións e o deseño e liderado de iniciativas que contribúan a impulsar o desenvolvemento da sociedade da información en Galicia, garantindo os dereitos dos cidadáns e eliminando as barreiras que se opoñan á expansión e uso.

Así mesmo, de acordo co artigo 5 do mencionado Decreto 252/2011, queda desconcentrada na persoa titular da dirección da AMTEGA a competencia para subscribir con entidades públicas e privadas, no seu nome, convenios de colaboración excluídos da lexislación de contratos do sector público.

Cuarto. A Lei 14/2013, do 26 de decembro, de racionalización do sector público, establece no seu artigo 14 que a Administración Xeral da Comunidade Autónoma e as entidades do sector público, ou estas entre elas, poderán formalizar acordos de colaboración ou cooperación ao servizo dos seus intereses xerais mediante o desempeño conxunto de tarefas de interese público da súa competencia.

Desde a efectividade da integración na AMTEGA dos servizos, recursos económicos e persoal de tecnoloxías da información e comunicacións da Consellería do Mar, a contratación en materia de tecnoloxías da Información e as comunicacións corresponde, con carácter exclusivo, á mesma.

Tendo isto en conta e a competencia exclusiva da AMTEGA para a dirección e xestión de todas as actuacións da Xunta en materia de tecnoloxías da información e as comunicacións, cómpre levar á cabo este acordo de colaboración para prestalo servizo de evolución e soporte dos sistemas de información de apoio na xestión das competencias e funcións que respecto das confrarías de pescadores lle corresponden ao Servizo de Apoio as Relacións coas Entidades Sectoriais da Consellería do Mar; desenvolvemento que debe ser dirixido e coordinado pola AMTEGA.

Por outra banda, o Consello da Xunta, na súa xuntanza do 1 de agosto de 2014, acordou aprobar "as instrucións para o establecemento dun modelo de sustentabilidade para a dixitalización dos servizos públicos". Seguindo o modelo de sustentabilidade para dixitalización dos servizos públicos, a Consellería do Mar e a AMTEGA manifestan a súa vontade de colaboración e con tal finalidade acordan a sinatura do presente acordo con suxeición ás seguintes

CLÁUSULAS

Primeira. Obxecto

O obxecto do presente acordo é establecer as pautas que se seguirán na colaboración entre a Consellería do MAR e a AMTEGA para a definición, evolución e soporte de novas funcionalidades nos sistemas de información de xestión das confrarías de pescadores de Galicia, así como nas aplicacións móbiles relacionadas co soporte e información nos procesos de eleccións que se desenvolvan.

Segunda. Financiamento

O importe da achega da Consellería do Mar para a execución do proxecto mencionado na cláusula primeira ascenderá a un máximo de CENTO OITENTA MIL EUROS (180.000,00 €) IVE incluído, para as anualidades 2026, 2027, 2028 e 2029.

Estes importes serán obxecto de retención de crédito nas seguintes aplicacións orzamentarias e proxectos do seu orzamento:

- Importe total: 180.000,00
- Aplicación orzamentaria: 16.03.722A.640.3
- Código proxecto: 2014 00639
- Anualidades: 2026, 2027, 2028 e 2029

Aplicación orzamentaria e proxecto	2026	2027	2028	2029	TOTAL
16.03.722A.640.3. - 2014 00639	45.000 €	50.000 €	45.000 €	40.000 €	180.000 €

Posteriormente a súa formalización, este acordo remitirase á Dirección Xeral de Orzamentos e Financiamento Autonómico xunto coa documentación pertinente, para que se leve a cabo a modificación orzamentaria correspondente na aplicación 16.03.722A.640.3, código de proxecto 2014 00639, da Dirección Xeral de Desenvolvemento Pesqueiro, coa correlativa ampliación de crédito na aplicación 10.01.571A.732.00 da Secretaría Xeral Técnica e do Tesouro da Consellería de Facenda e Administración Pública como financiadora da AMTEGA, e na aplicación 10.A1.571A.626.0 código de proxecto 2026.00009-Proxectos TIC ámbito do Mar dos orzamentos da AMTEGA para as anualidades 2026, 2027, 2028, 2029, condicionada á efectiva existencia de crédito axeitado e suficiente nos orzamentos da Comunidade Autónoma para o 2026 aprobados polo Consello da Xunta, na antedita aplicación e código de proxecto.

Terceira. Actuacións a desenvolver

No marco do obxecto descrito na cláusula primeira, a AMTEGA desenvolverá os seguintes traballos:

- ✓ Evolución e soporte do sistema de información (XECONF) que da soporte á xestión das confrarías de pescadores, federacións de confrarías e agrupacións sectoriais, incluíndo a migración de datos e a integración

necesaria con outros sistemas existentes. Entre outras melloras, abordarase:

- Solución de comunicación integrada do censo de membros.
 - Deseño e desenvolvemento dun rexistro de confrarías de pescadores.
 - Xestión de entradas de peticións de servizo a través de REXEL e deseño dunha ferramenta para darlles atención.
- ✓ Evolución e mantemento do sistema de xestión de actas dos procesos electorais das confrarías de pescadores de Galicia (ELECON) coa migración dos datos e documentos existentes no anterior sistema. Desenvolverase tamén un módulo de soporte documental ás eleccións de agrupacións sectoriais das confrarías de pescadores así como das federacións de confrarías.
- ✓ Actualización tecnolóxica e funcional para a publicación nos markets das aplicacións móbiles de apoio nos procesos electorais (ELECON_APP) que se desenvolven nas confrarías de pescadores de Galicia.

O soporte destes sistemas requirirá especial intensificación durante o cuarto trimestre do 2026 e primeiro trimestre do 2027, co obxecto dos procesos electorais e actividades relacionadas que se desenvolverán con motivo da realización das eleccións xerais a confrarías de pescadores, agrupacións sectoriais e federacións de confrarías.

Cuarta. Compromisos das partes

Ao abeiro deste acordo, pola AMTEGA desenvolveranse os seguintes compromisos:

- A tramitación administrativa e adjudicación do contrato ou contratos que teñan lugar para a realización do obxecto anteriormente definido. Para iso, a AMTEGA, como órgano de contratación, iniciará e aprobará os correspondentes expedientes de contratación. A AMTEGA actuará no expediente de contratación e na execución do contrato en nome e por conta das partes participantes neste acordo e poderá exercer todas as potestades que a lexislación lle recoñece ao órgano de contratación fronte ao contratista, sen prexuízo da adecuada coordinación nas relacións internas coa Consellería do Mar.
- O seguimento e a dirección das actuacións obxecto do acordo e contratos derivados do mesmo.

Pola Consellería do Mar desenvolveranse os seguintes compromisos:

- A definición detallada dos requisitos e funcionalidades que o novo sistema de información debe implantar.
- A validación dos requisitos funcionais das solucións que se desenvolvan.

A AMTEGA e a Consellería do Mar, desenvolverán de xeito conxunto os seguintes compromisos:

- Elaboración dos pregos de cláusulas administrativas particulares e de prescricións técnicas.
- Participación no órgano de contratación, que estará asistido, se fose necesario, por unha mesa de contratación constituída por persoal da AMTEGA e un representante designado pola Consellería do Mar. Tamén poderá participar persoal de ambas partes na emisión dos informes técnicos.

Asemade desenvolverase calquera outra actuación que, sendo complementaria das anteriores, acorden a Consellería do Mar e a AMTEGA, sempre que o seu custo estimado non supere o importe da achega máxima da Consellería recollido na cláusula segunda.

No caso de actuacións que supuxeran un engadido temporal ou financeiro sobre o marco establecido no presente acordo, poderán subscribirse as adendas que ambas partes acorden.

A titularidade dos sistemas e calquera resultado obtido coa execución das actividades obxecto do presente acordo, será da AMTEGA, conforme ás súas competencias.

Quinta. Vixencia

Este acordo producirá os seus efectos a partir da data da súa sinatura e a súa vixencia estenderase ata o momento que cese o desenvolvemento nel previsto, e como data límite, o 30 de decembro de 2029, sen menoscabo das posibles adendas ou prórrogas que as partes podan establecer e formalizar antes da finalización da vixencia inicial deste acordo.

Sexta. Publicidade do acordo

Será de aplicación no relativo á publicidade e rexistro do acordo de colaboración o disposto na Lei 1/2016, do 18 de xaneiro, de transparencia e bo goberno.

Procederase á súa inscrición no Rexistro de Convenios, de conformidade co establecido no artigo 5 do Decreto 126/2006, do 20 de xullo, polo que se regula o Rexistro de Convenios da Xunta de Galicia.

Sétima. Réxime xurídico e resolución de conflitos

Este acordo de colaboración ten natureza administrativa, e rexerese pola Lei 14/2013, do 26 de decembro, de racionalización do sector público autonómico e pola demais normativa de aplicación.

As discrepancias que se poidan producir resolveranse nos termos previstos no artigo 13 da Lei 16/2010, do 17 de decembro, de organización e funcionamento da Administración xeral e do sector público autonómico de Galicia, para os conflitos de atribucións.

E en proba de conformidade co exposto, asinan este acordo no lugar e data sinalados.

Pola Axencia para a Modernización
Tecnolóxica de Galicia (AMTEGA)

O director

Damián Rey Rodríguez

Pola Consellería do Mar

A conselleira do Mar

Marta Villaverde Acuña